

## #আমি পদ্মজা পর্ব ৬৩

বিছানার উপর কাঁথা মোড়ানো ফরিনার দুর্বল দেহটা শুয়ে আছে। বিদ্যুত নেই। ঘরের এক কোণে লণ্ঠন জ্বলছে। ফরিনার চোখ বোজা। লতিফা পায়ে পায়ে হেঁটে এসে নিঃশব্দে ফরিনার শিয়রে দাঁড়াল। ক্ষীণস্বরে ডাকলো, 'খালাম্মা ঘুমাইছেন?'

ফরিনা ধীরে ধীরে চোখ খুললেন। চোখের দৃষ্টি ঘোলা। কিছু মুহূর্তের ব্যবধানে বয়সের তুলনায় একটু বেশিই যেন বয়স্ক দেখাচ্ছে। ফরিনা কিছু একটা বললেন। লতিফা বুঝলো না। সে নত হয়ে ফরিনার মুখের কাছে নিজের মুখ এনে বললো, 'কী কইছেন খালাম্মা?'

ফরিনা দুর্বল গলায় নিম্নস্বরে বললেন, 'পদ্মজা কই?'

‘আপনের ঘরে না আইলো দেখলাম।’  
‘ঘুম থাইকা উইঠা তো দেহি নাই।’ ফরিনা  
থামলেন। তারপর বললেন, ‘এহন কই?’  
‘মনে কয় ঘরে আছে। ডাইকা দিমু?’  
‘না, থাকুক।’  
‘খাইবেন কিছু?’  
‘না। আরেকটা কেঁথা দে।’

লতিফা আলমারি থেকে লেপ বের করলো।  
তারপর ফরিনার গায়ের উপর দিল। আর  
বললো, ‘অনেক ঠান্ডা পড়ছে খালাম্মা। কাঁথা  
দিয়া হইবো না।’

ফরিনা লতিফার সাথে আর কথা বাড়ালেন না।  
তিনি জানালার বাইরে চোখ রাখেন। রাতের  
আকাশ দেখা যাচ্ছে। আর শীতল হাওয়া সাঁ, সাঁ  
করে ঘরের ভেতর ঢুকছে। তিনি আকাশের  
গায়ে বাবুর ছোটবেলার মুখটা দেখতে পেলেন।  
যখন বাবুর জন্ম হলো, আমিনা কপাল কুঁচকে

বলেছিলেন,'তোমার ছেড়ায় তো সত্যি কালা হইছে। আমি ঠিকই কইছিলাম।'

আমিনার কথা শুনে ফরিনার বিন্দুমাত্র রাগ হয়নি। বাবুর নিষ্পাপ মুখটা দেখে তিনি অভিভূত হয়ে পড়েন। সারা মুখে গুচ্ছ গুচ্ছ মায়া। এই মায়াময় শ্যামবর্ণের মুখ দেখে তিনি যেন পিছনের সব কষ্ট ধামাচাপা দিয়ে দিতে পেরেছিলেন। আদর করে কোলে নিয়ে ডেকেছিলেন,'আমার বাবু।'

মায়াময় এক রত্তি বাবুর নামকরণ হয় আমির হাওলাদার। ধীরে ধীরে বড় হয় আমির। মায়ের চুলের বেণি করে দেয়া ছিল তার নিত্যদিনের অভ্যাস। মায়ের হাতে তিন বেলা না খেলে পেটই ভরতো না। কতশত আবদার ছিল তার! আন্মা, আন্মা করে বাড়ি মাথায় তুলে রাখতো। যতবার আন্মা ডাকতো ততবার বোধহয় নিঃশ্বাসও নিতো না। ছোট থেকেই আমির স্বাস্থ্যবান,তেজি। বাবা-মায়ের আদরের

একমাত্র ছেলে ছিল। যখন আমিরের বয়স  
চৌদ্দ, তখন সে ফরিনাকে কোলে নিয়ে পুরো  
বাড়ি ঘুরেছে! ফরিনা সেদিন আবেগে আপ্লুত  
হয়ে ছেলেকে বকেছেন, উচ্চস্বরে হেসেছেন।  
জীবনে স্বর্গীয় সুখ নিয়ে এসেছিল আমির।  
পিছনের কথা ভেবে, ফরিনার ঠোঁট দুটি থরথর  
করে কেঁপে উঠলো। চোখ দুটি ভিজে উঠে  
জলে। এই বয়সে এসে স্মৃতির নরকীয় যন্ত্রণা  
হজম করা খুব কষ্টের। কম তো বয়স হলো না।  
পঞ্চাশের ঘরে পড়েছেন। ফরিনার চোখের  
দেয়াল টপকে উপচে পড়ছে নোনা জল। সেই  
জল দেখে লতিফা বিচলিত হয়ে  
উঠলো, 'খালাম্মা, ও খালাম্মা। কান্দেন কেন?'  
ফরিনা ঠোঁট কামড়ে কান্না আটকালেন। ভেজা  
কণ্ঠে বললেন, 'তুই যা লুতু।'  
লতিফা ঠায় দাঁড়িয়ে রইলো। বেশ কিছুক্ষণ পর  
বললো, 'পদ্মরে কিছু কইয়েন না খালাম্মা। কষ্টে  
মইরা যাইব। ছেড়িডা ভালা আছে। ভালাই

থাহক। মা-বাপ নাই।’

ফরিনা লতিফার চোখের দিকে তাকিয়ে প্রশ্ন করলেন, ‘তুই সব জানতি লুতু?’

লতিফা মাথা নত করে বলল, ‘হ।’

ফরিনা হিংস্র সিংহীর মতো গর্জে উঠে

বললেন, ‘আমারে আগে কইলি না কেন তুই?’

আমার বাবু কেমনে আমার হাত থাইকা ছুইটা গেলো? বাপের রক্ত কেমনে পাইলো?’

ফরিনা কাশতে থাকলেন। উত্তেজিত হওয়াতে শরীরের হাড়ে, হাড়ে তীব্র ব্যথা অনুভব হচ্ছে।

কেউ যেন কাঁটাচামচ দিয়ে একটার পর একটা ঘা দিচ্ছে। লতিফা আতঙ্কিত হয়ে পড়ে।

ফরিনার মাথায় হাত বুলিয়ে দিতে দিতে

বললো, ‘খালাম্মা, আপনি চিল্লাইয়েন না।

আপনের ক্ষতি হইবো।’

ফরিনা শ্বাসকষ্ট রোগীর মতো ঘন ঘন শ্বাস

নিতে নিতে বললেন, ‘আমার ক্ষতি হওনের আর কী আছেরে লুতু!’

লতিফা ভয় পেয়ে যায়। ফরিনা বিরতিহীন  
ভাবে কাশছেন। যেন শ্বাস নিতে পারছেন না।  
সে দৌড়ে দুই তলায় ছুটে যায় পদ্মজাকে  
আনতে। ফরিনা ছাদের দিকে চোখ নিবদ্ধ করে  
হা করে কয়েকবার নিঃশ্বাস নিলেন। মনে হচ্ছে  
দম গলায় এসে আটকে গেছে। তিনি শূন্য!  
একেবারে ফাঁকা কোল! মজিদ হাওলাদার  
নামক নরপিশাচ তার নিষ্পাপ বাবুকে খুন  
করে, নিষ্পাপ বাবুর মনকে খুন করে বাঁচিয়ে  
রেখেছে হিংস্র আমিরকে! হাওলাদার বাড়ির  
রক্ত থেকে তিনি তার বাবুকে পরিষ্কার রাখতে  
পারেননি। প্রজন্ম থেকে প্রজন্ম চলে আসা  
পাপের পাহাড় আমির যেন কয়েক বছরে  
কয়েকগুণ বড় করে তুলেছে! একজন দুঃখী  
মায়ের শেষ সম্বল হারিয়ে গেছে। হারিয়ে গেছে  
ভালোবাসারা, চলছে শুধু অভিনয়! যার কাছেই  
সেই অভিনয় ধরা পড়বে, তার জায়গা বন্দি ঘরে  
নয়তো কবরে।

বাতাসটাতে বোধহয় প্রকৃতি বিষ মিশিয়ে  
দিয়েছে। পদ্মজার বুক জ্বলছে। বুকের  
ভেতরটা তীব্র দহনে পুড়ে যাচ্ছে। তার সামনে  
দাঁড়িয়ে থাকা লোকটি তারই ভালোবাসার স্বামী!  
আমির হাওলাদার! আমিরের হিংস্র চোখ দুটি  
শিথিল হয়ে ভয়ে, আতঙ্কে জমে যায়। মস্তিষ্ক  
মুহূর্তে ফাঁকা হয়ে যায়। ছুট করে পদ্মজাকে  
দেখে তার চোখ দুটি স্বভাবসুলভ কারণে  
জ্বলজ্বল করে উঠে। যা হিংস্র দেখায়। কিন্তু এই  
মুহূর্তে তার হৃৎপিণ্ড দ্রুত গতিতে লাফাচ্ছে!  
হাত থেকে বেল্ট পড়ে যায়। আড়চোখে বিবস্ত্র  
মেয়েগুলোকে একবার দেখে, তার মাথা চক্কর  
দিয়ে উঠলো। এ কোন সময়ে পদ্মজার  
উপস্থিতি! পদ্মজার গাল বেয়ে জল মেঝেতে  
পড়ে। আমির দ্রুত পায়ে পদ্মজার কাছে  
আসে। পদ্মজাকে ছুঁতেই পদ্মজা ছ্যাঁত করে  
উঠল। ঘৃণাভরা দৃষ্টি নিয়ে তাকায় আমিরের  
দিকে। আমির জোর করে পদ্মজাকে তুললো।

পদ্মজা জোরে জোরে কাঁদতে থাকলো। সে দুই হাতে ধাক্কা দেয় আমিরকে। কিন্তু এক চুলও দূরে সরাতে পারেনি। আমির পদ্মজা দুই হাত পিঠের দিকে নিয়ে নিজের এক হাতে চেপে ধরে। অন্য হাতে পদ্মজার মাথা বুকের সাথে চেপে ধরে বললো, 'কিছু দেখোনি তুমি।' তারপর উচ্চস্বরে কাউকে ডাকলো, 'আরভিদ, আরভিদ! দ্রুত মেয়েগুলোকে ঢেকে দাও।'

আমিরের ডাক শুনে সেকেন্ড কয়েকের মধ্যে একজন দৌড়ে আসে। দেখতে শ্বেতাঙ্গদের মতো। লাল চুল। তার হাতে কাপড়। সে দরজা পেরিয়ে মেয়েগুলোকে ঢেকে দিতে যায়।

পদ্মজা কপাল দিয়ে আমিরের বুকে আঘাত করে আর্তনাদ করে বললো, 'ছাড়ুন আমাকে। আমার ঘেন্না হচ্ছে আপনাকে। কত নিকৃষ্ট আপনি!'

আমির বুঝতে পারছে না তার কী করা উচিত।

আচমকা ঘটনায় সে হতবুদ্ধি হয়ে পড়েছে।  
পদ্মজা ধ্বস্তাধস্তি শুরু করে। তার সারা শরীরে  
যেন পোকারা কিলবিল করছে। মেয়েগুলোর  
মধ্য থেকে একজন মেয়ে হাউমাউ করে কেঁদে  
উঠে বললো, 'আপা আমরারে বাঁচান। এই  
লোকটা আমরারে মাইরা ফেলব।'

আরভিদ নামের শ্বেতাঙ্গ লোকটি চোখের  
পলকে মেয়েটির গালে থাপ্পড় বসালো। মেয়েটি  
আম্মা বলে কেঁদে উঠে। পদ্মজার বুকের  
হাড়ে, হাড়ে কাঁপন ধরে। এসব কী হচ্ছে! কেন  
হচ্ছে! সব দুঃস্বপ্ন হয়ে যাক! হয়ে যাক! পদ্মজা  
গলা ফাটিয়ে চিৎকার করে উঠলো, 'ছাড়ুন  
আমাকে।'

আরভিদের থেকে পাওয়া কাপড়ের একটু  
অংশ বুকের সাথে জড়িয়ে ধরে, একটা মেয়ে  
পদ্মজাকে দেখছে। পদ্মজাকে দেখে মেয়েটার  
মনে হচ্ছে এই মানুষটা ভালো। এখানের সবার  
মতো খারাপ না। তাই সে অনুরোধ করে

বললো, 'আমাদের বাঁচান আপা। আমাদের অনেক মারে ওরা।'

আমির কিছুতেই পদ্মজাকে হটাতে পারছে না। যেন জায়গায় জমে আছে। মেয়েটির কথা শুনে আমিরের মাথার রক্ত টগবগ করে উঠে। সে তার রক্তচক্ষু দিয়ে ভয় দেখালো। আরভিদ মেয়েটির পেট বরাবর লাথি মারে। মেয়েটি কঁকিয়ে উঠে কাপড়ের অংশ থেকে দূরে সরে গিয়ে দেয়ালের সাথে গিয়ে ধাক্কা খেলো। নগ্ন দেহটি দেয়ালের সাথে ধাক্কা খেয়েই মেঝেতে পড়ে গুটিয়ে যায়। সেই গুটিয়ে যাওয়া দেহটির উপরই আরভিদ আরেকটা লাথি বসায়।

মেয়েটা চিৎকার অবধি করতে পারলো না! নির্মম, পাশবিক অত্যাচার পদ্মজাকে হিংস্র করে তুললো। সে শরীরের সবটুকু শক্তি দিয়ে আমিরকে দূরে সরিয়ে দিল। আমিরের খেয়াল ছিল মেয়েগুলোর দিকে, তাই সহজেই ছিটকে

যায়। পদ্মজা মেঝে থেকে তুলে নিলো ছুরি।  
আরভিদ কিছু বুঝে উঠার পূর্বেই পদ্মজা তেড়ে  
এসে মুখ দিয়ে অদ্ভুত উচ্চারণ করে  
আরভিদকে আঘাত করলো। আরভিদের  
পরনে ঘন জ্যাকেট ছিল। তাই তার বেশি  
আঘাত লাগেনি। তবে সে আকস্মিক আক্রমণে  
ঘাবড়ে যায়। পদ্মজাকে আঘাত করতে  
চায়, আমির চেষ্টা করে উঠলো, 'আরভিদ, থামো।'  
আরভিদ থামলেও পদ্মজা থামলো না। সে  
আবার আঘাত করতে উদ্যত হয়, ধরে ফেললো  
আমির। পদ্মজা হিংস্র বাঘিনীর মতো  
ফোঁস, ফোঁস করতে থাকে। তার শরীর কাঁপছে  
ক্রোধে। পদ্মজার রাগ দেখে আমির প্রচণ্ড  
অবাক হয়। পদ্মজার রাগ সে কোনোদিন  
দেখেনি! ফ্রান্স থেকে তারা অনেক যন্ত্রপাতি  
আনে। তার মধ্যে একটি পদ্মজার হাতের ছুরি।  
যে ছুরির ধার বিষের চেয়েও ধারালো। সে ছুরি  
পদ্মজার হাতে! আমির জোরদবস্তি করে

পদ্মজার হাত থেকে ছুরি ফেলে দিলো।  
মেয়েগুলো ভয়ে কাঁপছে। তারা এখন  
পদ্মজাকেও ভয় পাচ্ছে। এতো সুন্দর মেয়ের  
তেজি রূপ দেখে মনে হচ্ছে, হাজার বছর ধরে  
যুবতিদের রক্ত দিয়ে গোসল করে সৌন্দর্য রক্ষা  
করা এক ভয়ংকর সুন্দরী ডাইনি তাদের সামনে  
দাঁড়িয়ে আছে। আমার পদ্মজাকে জোর করে  
টেনে হিঁচড়ে ঘরের বাইরে নিয়ে আসে। পদ্মজা  
হাত পা ছুটাছুটি করছে। চিৎকার করছে। দূরেই  
দাঁড়িয়ে ছিল আরেকজন লোক। তার চুলগুলো  
মেয়েদের মতোন অনেক লম্বা, তবে ফর্সা।  
এতো চঁচামিচি শুনেও ভেতরে যায়নি। কারণ,  
আমির না বললে তারা এক পাও নড়ে না।  
আমির পদ্মজার সাথে ধ্বস্তাধস্তি করতে করতে  
বললো, 'মেয়েগুলোকে সামলাও, দ্রুত যাও।  
আরভিদকে সাহায্য করো।'

লোকটি আমিরের আদেশমতো চলে গেলো।  
পদ্মজা নিজের কান দুটি বিশ্বাস করতে পারে  
না। তার স্বামীর কণ্ঠে এ কি শুনছে সে! বুকের  
জ্বালাপোড়া বেড়ে চলেছে। মরে যেতে ইচ্ছে  
করছে তার! আমির পদ্মজাকে একটা ঘরে  
নিয়ে আসে। পদ্মজা নিজের মধ্যে নেই। সে  
কিড়মিড় করছে, কাঁদছে। আমির পদ্মজাকে  
একটা চেয়ারে বসিয়ে দ্রুত চেয়ারের সাথে  
বেঁধে ফেললো। তখন পদ্মজার সুযোগ ছিলো  
আমিরকে ধাক্কা মেরে পালানোর চেষ্টা করার।  
কিন্তু সে পারেনি! সে কার থেকে পালাবে?  
নিজের স্বামীর থেকে? যাকে সে ভালোবাসে।  
যে মানুষটা তাকে বুকে নিয়ে ঘুম পাড়ায়।  
খাইয়ে দেয়। শতশত আবদার পূরণ করে!  
পদ্মজা ডুকরে কেঁদে উঠলো। এক হাতের  
উপর কপাল ঠেকিয়ে কাঁদতে কাঁদতে  
বললো, 'আমি মেনে নিতে পারছি না।'

আমির পদ্মজার চেয়ে কিছুটা দূরে চেয়ার নিয়ে বসলো। তার চোখেমুখে আতঙ্ক! সে চেয়ে রইলো পদ্মজার দিকে। পদ্মজা চোখ তুলে তাকায়। আমিরের চোখে চোখ পড়ে। সে ঠোঁট দুটি ভেঙে কেঁদে বললো, 'আপনি আমাকে বাঁধতে পারলেন?'

আমির কিছু বললো না। পদ্মজা বললো, 'আপনি ওভাবে মেয়েগুলোকে মারতেও পারলেন?'

আমির আগের অবস্থানেই রইলো। পদ্মজা নাক টেনে বললো, 'এতো খারাপ আপনি? এতো বেশি! মেয়েগুলোকে কেন মারছিলেন?'

আমির শুধু চেয়েই আছে। পদ্মজা বললো, 'এতো নিষ্ঠুর আপনি? সব দুঃস্বপ্ন হতে পারে না?'

আমির পদ্মজার প্রশ্ন উপেক্ষা করে বললো, 'রিদওয়ান কোথায়?'

পদ্মজা কান্না খামিয়ে হাসলো। ধারালো সেই

হাসি। ঠোঁটে হাসি রেখেই বললো, 'আমাকে  
পাহারা দিতে রেখেছিলেন? মারতেও কি  
বলেছিলেন?'

'যা বলছি উত্তর দাও।'

পদ্মজা সেকেন্ড কয়েক আমিরের মুখের দিকে  
চেয়ে রইলো। তারপর বললো, 'মেরে দিয়েছি।'  
আমির চমকে উঠলো, 'কি!'

'মরেনি। হাসপাতাল আছে।'

আবারও পিনপতন নীরবতা। পদ্মজা  
আমিরকে দেখছে। যে মুখে মায়া ছাড়া কিছু  
দেখতো না সে, আজ সে মুখটাই চিনছে না।  
বুকের ভেতরটা কেমন করছে! আল্লাহ যেন  
বুকের ভেতর জাহান্নামের আগুন ধরিয়ে  
দিয়েছে। পদ্মজার মস্তিষ্কের সব প্রশ্ন উধাও  
হয়ে গিয়েছে। শুধু দেখছে আমিরকে, ভাবছে  
আমিরকে নিয়ে। পদ্মজা ম্লান হেসে জানতে  
চাইলো, 'এখন কী করবেন আমাকে নিয়ে? বুকে

ছুরি চালাবেন? নাকি রাম দা? মারার জন্য আর  
কিছু কি আছে?’

আমির নিশ্চুপ। সে নিজেও জানে না সে কী  
করবে! পদ্মজা বললো, ‘পশুরা কাউকে  
ভালোবাসে?’

আমির মুখ খুললো, ‘বাসে বোধহয়।’

পদ্মজা হাসলো। হাসতে হাসতে চেয়ারে হেলান  
দিল। তারপর আবার সোজা হয়ে বসলো।

গুরুতর ভঙ্গিতে বললো, ‘মেয়েগুলোকে ছেড়ে  
দিন।’

‘অসম্ভব।’

‘আমি ঠিক ছাড়িয়ে নেব।’

‘আর কিছু করো না।’

‘কী করবেন? খুনই তো।’

‘একটু ভয়ডর ঢুকাও মনে।’

‘বিশ্বাস করুন, আপনার বুকে ছুরি চালাতে  
আমার খুব কষ্ট হবে।’

আমির চকিতে তাকালো। পদ্মজা কথাটা বলে  
কাঁপতে থাকলো। নিয়তি তাকে কোথায় নিয়ে  
যাচ্ছে! কী বলাচ্ছে! এই কথাটা সে মন থেকে  
বলেনি। সে কিছুতেই এমন কথা বলেনি!

আমির নিজেকে সামলে নিয়ে বললো, 'ভালোই  
তো ছিলাম আমরা!'

'মুখোশধারীর সাথে আবার ভালো থাকা!'

'একদম মায়ের মতো হয়েছে।'

'নিঁখুত অভিনেতা!'

'বাধ্য হয়ে।'

'কে করেছে বাধ্য আপনাকে?'

'তোমার আদর্শ। তোমার পবিত্রতা।'

'আপনি কলুষিত করেছেন।'

'বিয়ে করেছি।'

'কেন করেছেন? ভোগ করে মেরে নদীতে  
ভাসিয়ে দিতেন। তাহলে ভালোবেসে আজকের  
নরকীয় যন্ত্রণাটা সহ্য করতে হতো না।'

‘সব ভুলে যাও। রানির হালে থাকবে।’ আমিরের  
কণ্ঠে জোর নেই। সে পদ্মজাকে চিনে।

পদ্মজাকে সে এতদিন অন্ধকারে  
রাখলেও, পদ্মজা তাকে আলোতে রেখেছিল।  
সেই আলো দিয়ে আমির চিনতে পেরেছে  
পদ্মজাকে। পদ্মজা অন্যায় মেনে নেয়ার মেয়ে  
নয়। কিন্তু চেষ্টা তো করতে হবে। আজও  
পদ্মজা জানতে পারতো না কিছু, যদি সে ঝড়ের  
কবলে না পড়তো! গুটি ওলটপালট হয়ে  
গেছে! এরেই বোধহয় বলে চোরের  
দশদিন, গৃহস্থের একদিন।

পদ্মজা ছলছল চোখে আমিরকে দেখে। সে  
চোখের সামনে সবকিছু দেখেও যেন বিশ্বাস  
করতে পারছে না। সর্বাস্থে যে কষ্টটা  
হচ্ছে, শরীর থেকে রুহ বের হয়ে যাওয়ার  
সময়ও বোধহয় তেমন কষ্ট হয় না। পদ্মজা  
ঝরঝর করে কেঁদে দিল। এ কেমন নিয়তি তার!

যতক্ষণ সে সামনে থাকে ততক্ষণ প্রেমের কথা  
বলা মানুষটা তাকে দড়ি দিয়ে বেঁধে রেখে ঠান্ডা  
মাথায় ভাবছে, তাকে নিয়ে এখন কী করা যায়!  
পদ্মজা তার হাতের চুড়িগুলো দিকে তাকালো।  
চুড়ি দুটো তার মায়ের। মায়ের কথা খুব মনে  
পড়ছে! এই পৃথিবীতে তার একমাত্র  
ছায়া, একমাত্র ভরসার স্থান ছিল তার মা! মা  
মারা গেল। তারপর সেই স্থানটা পরিবর্তন হলো  
আমিরের নামে। সেই মানুষটার রূপ এভাবে  
গিরগিটির মতো পাল্টে গেল! না, পাল্টে যায়নি।  
এমনই ছিল। শুধু মুখোশ পরে ছিল। ছদ্মবেশী!  
মেয়েগুলোর চিৎকার ভেসে আসে। তাদের  
অত্যাচার করা হচ্ছে খুব। কিছু একটা দিয়ে  
পিটাচ্ছে, ফ্যাচফ্যাচ শব্দ হচ্ছে। কোন বাবা-  
মায়ের চোখের মণিদের এভাবে অত্যাচার করা  
হচ্ছে! পদ্মজা চিৎকারগুলোকে ইঙ্গিত করে  
বললো, 'আপনার কষ্ট হয় না? একটুও হয় না?'

আমিরের ভাবান্তর হলো না। সে চিন্তায় মগ্ন।  
তার ছক উল্টে গেছে। এমন এক জায়গা এসে  
ছক উল্টেছে যে আর ঠিক করার উপায় নেই।  
নতুন করে সাজালে সেখান থেকে হয় পদ্মজা  
নয় এতো বছরের পাপের সাম্রাজ্য ত্যাগ করতে  
হবে! তুখোড় আমির মনে মনে পরিকল্পনা  
করলো, আপাতত,যে কাজের জন্য তার ছুটে  
আসতে হয়েছে অলন্দপুরে সে কাজটা সম্পন্ন  
করতে হবে। এই চাপটা মাথার উপর থেকে  
গেলে তারপর অন্যকিছু। কয়টা দিন  
পদ্মজাকে নজরে রাখতে হবে। কিন্তু যদি,সেই  
কাজ করার পথেই পদ্মজা দেয়াল হয়ে দাঁড়ায়!  
পদ্মজা চেয়ার থেকে ছুটতে চাইছে। ছটফট  
করছে। সে আমিরকে অনুরোধ  
করলো,'শুনছেন আপনি, ওদের মারতে নিষেধ  
করুন। আপনার বুক কাঁপছে না? ওদের কান্না  
অনুভব করুন। ওদের কষ্ট হচ্ছে অনেক।

পুরো... পুরো শরীরে রক্ত ছিল। তার উপর  
আবার মারছে। আমি সহ্য করতে পারছি না।'  
আমির চুপ করে তাকিয়ে আছে পদ্মজার  
দিকে। তার চোখের পলক পড়ছে না। চাইলেও  
আর অজুহাত দেয়া সম্ভব নয়। অজুহাত  
দেয়ার মতো কিছু নেই। এবার যা হবে সরাসরি  
হবে। পদ্মজার কান্না বেড়ে যায়। পদ্মজা কি  
মেয়েগুলোর জন্য কাঁদছে নাকি নিজের স্বামীর  
সমর্থনে মেয়েগুলো অত্যাচারিত হচ্ছে বলে  
কাঁদছে? কে জানে।

চলবে...